

Ferton che nos mieds da communicaziun, sco radio, televisiun e gasettas, rapportan dil progress enorm dalla tecnica, da rapports d'uiara, cravals e caumas ord igl entir mund, prosperescha en tutta tgeuadad ina pintga flur empau fallombra, nossa Uniun Romontscha da Sargans e contuorn. En tutta modestiadad sto ella esser precauta da buca vegnir zapitschada dil svilup da nies temps modern. Igl intent da noss'uniun ei, oz sco mai, giustifiaus, da spindrar e mantener ina cultura linguistica che para da vegnir sdermada da nies svilup continuau. Nies car lungatg romontsch ei, malgrad tut sforz d'autoritads ed entgins idealists per il manteniment da quel, en grond prighel. Nossa uniun ha surpriu la nobla missiun da reunir tuts romontschs da nossa regiun songagliesa e cheutras sespruvar da mantener nies lungatg era egl jester. Deplorablamein muossa ina gronda part da quels romontschs e romontschas pign interess per nies destin. Ils motivs ein a nus buca capeivels. (ord il pareri dil president Anton Flury digl avrel 1969)

Caras commembras, stimai commembers

Sche nus lein sebasar sin il retagl dil pareri, screts avon bunamein 60 onns digl anteriur president Anton Flury, pudessen ins tertgar ch'il temps, buca sulet quei che pertucca nies lungatg romontsch, ei semidau nuotzun. Cun menziunar vitier tut quei che prosperescha ozildi cun gronda rasanza ella reit digitala, sco per exempel Facebook, YouTube, TikTok, Instagram ed era WhatsApp, cumpletau cun novas reits sco Threads, Bluesky, Mastodon ed aschia vinavon, savess il pareri da lezzas uras datar dil 2026.

Tuttina astgein esser loschs che la flur, la tala era igl onn 1969 aunc empauet fallombra, prosperescha aunc adina e quei pir che mai. In grond meret persuerter han segir era mes dus predecessurs Anton Flury e Venanzi Casanova. Els han tgamunau noss'uniun cun grond engaschi e capientscha durant in liung temps, vul dir, in sco l'auter ei staus mintgamai durant 26 onns president da tala, avon che jeu vai astgau sorprendere ella avon 8 onns sco pér tierz parsura! Denton, negina tema, jeu da mia vart vai buca muostgas da tschentar si novs records d'uffezi ni da vegnir cul temps catschus a ligiavel perquei che vus essas unfis da mei. Anzi, jeu vaiel veramein l'intenziun da surdar il presidi sin la

radunonza generala 2027 en mauns pli giuvens che pon, speranza, purtar novas ideas ed intenziuns.

Considerand l'atmosfera chi regnaiva a l'ultima tschantada da suprastanza, a's vess pudieu crajer cha noss UNIUN gess in paglia! A füss pcho da schoglier noss'UNIUN, güst ta il mumaint da nos giubileo da 20 ans d'existenza. Hermina managia da renover la suprastanza cun forzas giuvnas. Ma inua valains nu sir a piglier medemmas? Walter racumanda da tegner tuots insebel ed alur agiaro que bain darcho inavaunt. Eir Valentin ais dal'avis dad ir inavaunt, tuot las societeds haun pissers per lur existenza. (ord il protocol dalla seduta da suprastanza dils 15 da schaner 1986)

Cun las demissiuns dalla vicepresidenta Fidelia Staub sin la radunonza generala 2026 e da mia paucadad en in onn, po ei dar ina pulita midada en suprastanza. Era sche la situaziun pertuccont l'UNIUN fa actualmeins fetg grond plascher ed ei tut outra che la tala che vegn numnada el protocol d'avon 40 onns e la suprastanza actuala harmonescha fetg bein, serepeta in quitaun tonaton. Numnadamein la damonda, nua pomai anflar glied giuvna ch'ei prompta da sorprendere responsabladad cun curclar ils posts da suprastanza che vegnan vacants el proxim temps!

Getg serius, jeu saiel buc. Denton, era sche nus havein retschiert fin ussa sulet rispostas negativas da candidatas e candidats puseivels essan nus ferm dalla perschusiun d'anflar, cun vus ensemen, ina sligaziun che cuntenta e segirescha vinavon l'existenza dall'Uniun Rumantscha Rezia Bassa per ils proxims decenis.

Igl ei bein surpudent d'astgar festivar uonn cun vus ensemen ils bials anniversaris da 60 e 40 onns dad uniun e chor. Era sch'igl ei stau, per la gronda part, bi e captivont el vargau, ussa vala ei da metter tut nies focus sil futur. Dil tuttatafag falliu füss ei da ruassar ora sin las arbagias recaltgadas. Cuntrari, ei drova vinavon gronds sforzs da tuttas varts per mantener il contonschiu e, tgei ch'ei essenzial, da sesvilupar e d'anflar novs impuls che portan vinavon l'uniun e garanteschian il survivor da tala era els proxims decennis. Quei malgrad il temps stuorn ed incert d'ozildi e cun tut las sfidas ch'ei da supportar.

Cun sorprendere da gliez temps il presidi vaiel giu biaras finamiras. Entginas astgel pretender da tuttaviva haver

contonschìu, autras denton, quei ord differents motivs, buca dil tut.

Cheu patratgel d'ina vart da buca haver pudìu perschader dapli Surmirans, Puters e Valladers d'entrar ell'uniun ed aschia saver ulivar ora empauet la sorprendenta dominanza dils Sursilvans. In emprem pass fuss segiramein d'anflar simeines ina persuna ladina per in dils posts che vegnan vacants il proxim temps en supra-stonza. Dumandai ein senz'auter era ils Ladins sez da far il pass nezessari leutier. Da l'otra vart astgan era ils Sursilvans surportar empauet lur retenientschas visavi ils auters idioms, quei sut il motto : nus essan buca Talians, era buca Franzos ni Tudestgs, nus essan tuts ensemen loschs Rumantschs.

Vinavon eis ei aunc insuma buca reussiu d'animar dapli famiglias giuvnas, ch'ei da casa ella regiun, da far part a nossa cuminonza rumantscha, cheu drova ei aunc in immens sforz.

Plascheivlamein ha igl Uffezi Federal da Cultura UFC empermess da metter a disposiziun uonn a noss'uniun entgins daners, aschia ch'ina certa basa finanziaria ei avon maun per in ni l'auter project niev en favur d'affons e famiglias giuvnas rumantschas egl intschesch dalla Rezia Bassa. Denton, tuts daners che stattan a disposiziun ein nunrelevants sche sforzs ed engaschis da tuts involvai mauncan e nossa glied giuvna preziescha e nezzegia buca il purschìu.

Cumplettamein contraproductiv fuss ei da l'otra vart da metter il focus sulettamein sin la giuventetgna, sin las famiglias. L'Uniun Rumantscha Rezia Bassa, e cun ella nies Chor maschadà rumantsch, prosperescha, sco ei semussa già dapi biars onns, engrazièl al grond engaschi da tuttas generaziuns. Il lungatg romantsch

ha sulet in futur, sche tal vegn plidaus el mintgadi, seigi quei ellas regiuns da tschep, denton oravontut era ella diaspora. Leu nua che adina dapli Rumantschas e Rumantschs ein da casa han era gest las uniuns romantschas che possibiliteschen da s'inscuntrar, da plidar il lungatg mumma era el jester, ina gronda impurtonza e merettan, suenter miu meini, dapli support, oravontut dallas instituziuns responsablas!

Schia, ussa selegrel fetg sin nossa fiasta da giubileum a caschun dalla radunonza generala dils 28 da mars 2026, quei cun la gronda speranza d'astgar beneventar quei di la gronda part da vus a Maiavella per festivar da mordio ils giubileums da 60 e 40 onns d'uniun e chor!

Caras commembras, preziai commembers, cun in grond engraziament a vus tuts per vies engaschi en favur da nossa uniun e vossa preschientscha (che astgas denton magari esser empauet pli numerusa) allas sentupadas, lessel finir miu pareri 2026.

En quei senn, ad in bien seveser allas proximas sentupadas rumantschas, e naturalmein era allas occurenzas da nies chor. Jeu sperel e selegrel fetg sin vossa stedia participaziun! Dil reminent, era propostas da vossa vart per occurenzas ed ulerieras ideas per il beinstar dall'uniun ein senz'auter fetg tschercadas!

Viva la Grischa, viva il Rumantsch e viva l'Uniun Rumantscha Rezia Bassa!

Mols, ils 15 da fevrer 2026
vies president Rinaldo Caduff